

摘藻堂四庫全書薈要

史部

欽定四庫全書薈要卷六千七百四十九史部

明史卷一百五十六

大學士張廷玉等奉 敕修

列傳第四十四

吳允誠

子克忠  
孫瑾

薛斌

子賢  
李賢

吳成

滕定  
金順

金忠

蔣信

李英

從子文

毛勝

焦禮

毛忠

孫銳

和勇

羅秉忠

吳允誠蒙古人名巴圖特穆爾居甘肅塞外塔溝地官至平章永樂三年與其黨婁多爾呼率妻子及部落五千馬駝萬六千因宋晟來歸帝以蒙古人多同名當賜姓名之尚書劉儁請如洪武故事編為勛合允誠得賜姓名授右軍都督僉事婁多爾呼亦賜姓名柴秉誠授後軍都督僉事餘授官賜冠帶給畜產鈔幣有差使領所部居涼州耕牧晟以招徠功封西寧侯自是降附者

益衆邊境日安由允誠始七年往額齊納覲敵禽哈喇  
等二十餘人進都督同知明年從出塞敗布尼雅錫哩  
進右都督尋進左都督與中官王安追庫森齊至巴哩  
河獲之封恭順伯食祿千二百石予世券允誠三子達  
蘭周爾珍克勤允誠與二子從軍留其妻及周爾珍居  
涼州番人呼巴等誘脅允誠衆欲叛去允誠妻與周爾  
謀召部將都督揮保喇巴延布哈等禽其黨誅之帝喜  
降敕獎之賜緡鈔羊米甚厚授周爾珍指揮僉事保濟

賜姓名楊效誠授指揮僉事剌難可汗鄯勒齊遇弒其下  
多潰達蘭與伯爾克請出塞自効有功伯爾克者秉誠  
誠子也帝征衛勒特允誠父子皆從師還命仍居涼州  
備邊允誠卒贈邠國公諡忠壯命達蘭更名克忠襲其  
爵再征阿魯台從行三征阿魯台復從兄弟皆有功洪  
熙元年以威里思克忠進侯時固爾珍已積功至都指  
揮同知亦封廣義伯克忠嘗充副總兵巡邊正統九年  
統兵出喜峰口征烏梁海有功加太子太保土木之變

克忠與其弟都督克勤子瑾為後拒寇突至驟戰不勝  
敵兵據山下飛矢石如雨官軍死傷畧盡克忠下馬射  
矢竭猶殺數人與克勤俱歿於陣贈邵國公諡忠勇克  
勤贈遵化伯諡僖敏瑾被執逃歸嗣侯英宗嘗欲使瑾  
守甘肅辭曰臣外人若用臣守邊恐外裔輕中國帝善  
其言乃止曹欽反瑾與從弟琮聞變權長安門上告門  
閉欽攻不得入遂縱火瑾將五六騎與欽力戰死贈涼  
國公諡忠壯子世泰三傳至曾孫繼爵嘗守備南京傳

子汝蔭孫惟英與繼爵皆總督京營戎政崇禎末都城陷汝蔭弟勲衛汝徵偕妻子投繯死固爾珍卒子玘嗣固爾珍妻索諾木亦有智畧嘗親入朝獻良馬朝廷多其忠玘卒固爾珍弟克勤子宗嗣鎮守寧夏成化四年滿四反琮坐激變且臨陣先退下獄論死謫戍邊爵除薛斌蒙古人本名托歡父蘇台洪武中歸附賜姓薛累官燕山右護衛指揮僉事斌嗣職從起兵累遷都督僉事從北征有功進都督同知永樂十八年封永順伯祿

九百石世指揮使斌卒子碩通方五歲從父瓚引見仁宗立命嗣伯賜名綬長驍勇善戰正統十四年秋與成國公朱勇等遇敵于鷓兒嶺軍敗弦斷矢盡猶持空弓擊敵敵怒支解之既而知其本蒙古人也曰此吾同類宜勇健若此相與哭之謚武毅子輔孫勲竝得嗣伯勲子璽乃嗣指揮使如券文貴本名托和齊斌之弟以舍人從燕王起兵屢脫王于險積官都指揮使再從北征進都督僉事永樂二十二年封安順伯祿九百石宣德



元年進侯加祿三百石子世券卒贈濱國公諡忠勇無  
子從子山嗣為指揮使天順改元以復辟恩命山子忠  
嗣伯卒子瑤嗣弘治五年子昂降襲指揮使李賢初名  
綽羅韃靼人元工部尚書洪武中十一年來歸通譯書  
太祖賜姓名授燕府紀善侍燕世子最恭謹北平師起  
有勞積累遷都指揮同知凡塞外表奏及朝廷所降詔  
敕皆命賢譯賢亦屢陳所見成祖皆採納之仁宗即位  
念舊勞進後軍都督僉事再進右都督賜賚甚渥尋召

見憫其病封忠勤伯食祿千一百石尋卒

吳成遼陽人初名瑪魯父乜已元遼陽行省右丞太祖  
時古通來降乜已父子與俱瑪魯更令姓名充總旗數  
從大軍出塞建文元年授永平衛百戶降燕從戰皆有  
功三遷都指揮僉事始知名南京聞吳瑪魯名多於陣  
上指目之設伏淝河進兵小河名戰齊眉山攻敗靈璧  
軍皆力戰功多成祖即位授都指揮使從征布尼雅錫  
哩疾戰布尼雅錫哩以七騎遁從征阿魯台合朱榮兵

為前鋒追至科漫海召還進都督僉事又三從出塞洪  
熙元年進左都督從陽武侯薛祿征大松嶺為前鋒有  
功增祿米宣宗初以成祖宿衛東宮錄舊勞封清平伯  
祿千一百石于世泰從征樂安復與薛祿為前鋒事定  
出守備興和戎好畋獵而不修武備寇伺其出獵卒入  
城掠其妻孥以去帝聞之置不罪已而阿嚕台入貢還  
其家口三年帝北征從敗賊于寬河進侯祿如故八年  
卒贈渠國公諡壯勇于忠前死忠子英嗣四傳至元孫

坐貪淫奪爵久乃復之卒無子從弟琮嗣四傳至元孫  
遵用崇禎末京師陷被殺滕定父瓚任元樞密知院洪  
武中來降授會州衛指揮僉事賜姓滕從燕起兵進燕  
山右衛指揮使卒定嗣官屢從出塞有功進至都督僉  
事宣德四年封奉化伯祿八百石正統初卒子福嗣為  
指揮使金順本名阿爾噶錫哩永樂中來降授大寧都  
指揮僉事從敗布尼雅錫哩又敗阿魯台累進都督僉  
事宣德三年從巡北狩有斬俘功明年封順義伯祿八

八百卒子忠嗣為指揮僉事

金忠者蒙古王子額森托干也素桀黠為阿魯台所忌  
永樂二十一年成祖親征漠北至上莊堡率妻子部屬  
來降時六師深入寇已遠遁帝方恥無功見其來歸大  
喜賜姓名封忠勇王賜冠帶織金襲衣坐之列侯下撤  
御前羞珍賜之復賜金銀寶器忠大喜過望班師在道  
忠駢從數問寇中事眷寵日隆明年忠請為前鋒討阿  
魯台自效帝初不許會大同開平警報至諸將請從忠

言帝復出塞忠與陳懋為前鋒而阿魯台聞王師復出  
倉皇渡達蘭納穆爾河遁去忠懋至河不見寇抵白印  
山卒無所遇乃班師仁宗嗣位加太子太保竝支二俸  
宣德三年親征烏梁海敗寇于寬河忠與巴爾台請自  
效帝許之或言不可遣帝曰去留任所欲耳朕有天下  
獨少此二人邪二人獲數十人馬牛數百來獻帝喜命  
中官酌以金卮遂賜之明年加太保六年秋卒命有司  
治喪葬巴爾台者忠之甥從忠來降授都督僉事宣德

初賜姓名蔣信正統初封忠勇伯從駕陷土木額森使  
隸賽堪王帳下信雖居沙漠志常在中國詣上皇所慟  
哭擁衛頗至已竟從駕還詔復給其祿景泰五年卒贈  
侯諡僖順子伊埒索郭襲爵天順初更名善弘治中卒  
無子爵絕

李英西番人父囊格洪武中率衆歸附授西寧州同知  
累功進西寧衛指揮僉事英詞官永樂十年番酋婁達  
袞叛英擊之討來川俘斬三百六十人夜雪賊遁追盡

獲之進都指揮僉事番僧張彌爾瑪者通譯書成祖授  
以左覺義居西寧恣甚以計取西寧貢使賞納逋逃交  
通外域肆惡十餘年英發其事磔死籍其家西陲快之  
未年中官喬來喜鄧成等使西域道安定庫森遇賊見  
未掠所齎金幣仁宗璽書諭赤斤軍東及安定庫森詰  
賊主名而赦英與土官指揮康壽等進討英詞知安定  
指揮哈薩繖蘇克庫森指揮薩奇蘇實殺使者遂率兵  
西入賊驚走追擊踰崑崙山深入數百數至雅爾噶與



安定賊遇大敗之俘斬千一百餘人獲馬牛雜畜十四萬庫森賊聞風遠遁安定王桑爾節沙克置等懼詰闕謝罪宣宗嘉英功遣使褒諭宴勞之令馳驛入朝既至擢右府左都督賜賚加等宣德二年封倉寧伯祿千一百石并封囊格如子爵英恃功而驕所為多不法寧夏總兵官史昭奏英父子有異志囊格上章辯賜敕慰諭之英宗西寧招逋逃七百餘人置莊墾田豪奪人產復為兵部及言官所劾帝宥英逋逃者入官七年西寧指

揮祁震子成當襲父職庶兄嘉勒察英甥也欲奪之成  
從祖太平攜成赴京辯英遣入簾取太平及其義兒杖  
之義兒竟死言官交劾并及前罪遂下英詔獄奪爵論  
死正統二年始釋解稍給其祿尋卒英宗復辟官其子  
杲錦衣指揮同知尋進都指揮使用薦擢左軍都督僉  
事屢分典營務以嚴慎稱英從子文宣德間為陝西行  
都司都指揮僉事西番思俄可嘗盜他部善馬都指揮  
穆肅求不得會思俄可以畜產鬻于邊肅誣以盜收掠

致死番人惶駭思亂文劾之逮肅下吏西陲以寧累官  
都指揮使天順改元冒迎駕功進都督僉事未幾以右  
都督出鎮大同寇二千餘騎犯威遠文率師敗之封高  
陽伯石亨敗革奪門冒功者官文自首帝以守邊不問  
四年秋保刺大舉入寇文按兵不戰遂入鴈門大掠忻  
代諸州京師震恐寇退徵文下詔獄論斬帝宥文死降  
都督僉事立功延綏既而進都督同知成化中哈魯為  
土魯番所并力救于朝詔文與右通政劉文往甘肅經

畧之無功而還弘治初卒正德初贈高陽伯

毛勝字用欽初名福壽元右丞相已爾布魯之孫伯父  
諾海洪武中歸附以北平功至都指揮同知無子勝父  
安太嗣為羽林指揮傳子濟無子勝弟嗣論濟征北功  
進都指揮使嘗逃歸塞外尋復自還正統七年以征麓  
川功擢都督僉事靖遠伯王驥請遷在京番將舍人捕  
苗雲南乃命勝與都督冉保統六百人往已再征麓川  
即命二人充左右叅將賊平進都督同知十四年夏額

森夏入寇勝偕平鄉伯陳懷等率京軍三萬鎮大同懷  
遇寇戰歿勝脫還以清武伯石亨薦景帝進勝左都督  
督三千營操練貴州苗大亂詔勝往討未行而額森逼  
京師勝禦之彰義門北擊退之越三日引兵西直門外  
解都督孫鏜圍明日都督興武戰歿于彰義門寇乘勝  
進勝與都督史王竑急援之寇遂引却勝追襲至紫荆  
關頗有斬獲事定乃命以左副統兵河間東昌降夷赴  
貴州賊首韋同烈據香鑪山作亂勝與總兵梁瑄右副

總兵方瑛等從總督王來分道夾擊勝進自重安江大破之會師山下環四面攻之賊窘縛同烈降還討湖廣巴馬諸處反賊克山十餘寨禽令首吳奉先等百四十人斬首千餘級封南寧伯子世券疏請更名從之移鎮騰衝金齒芒市長官刀放革潛結麓川遺孽思卜發為變勝設策禽之巡按御史牟奉勅其貪暴不法數十事且言勝本降人狡猾難制今又數通外夷恐貽邊患詔巡撫覆實卒置不問天順二年卒贈侯謚莊毅子榮嗣

坐石亨黨發廣西立功成化初鎮貴州尋移兩廣卒子文嗣弘治初協守南京傳爵至明亡乃絕

焦禮字尚節蒙古人父巴爾斯台歸附太祖為通州衛指揮僉事子勝嗣傳至義榮無子以勝弟謙嗣累功至都指揮同知卒子衮什訥幼謙弟禮借襲其職備禦遼東宣德初禮當還職宣宗念禮守邊勞命居職如故別授衮什訥指揮使禮尋以年勞累進都指揮同知正統中積功至右都督英宗北狩景帝命充左副總兵守寧

遠未幾額森逼京城詔禮率命入衛寇退還鎮景泰四年賊二千餘騎犯興戎堡禮擊走之璽書獎勵進左都督英宗復辟以禮守邊有功召入覲封東寧伯世襲賜賚甚厚遣還鎮兵部以禮年垂八十不可獨任奏遣都指揮鄧鐸協同守備居無何禮奏鐸欺侮請更調命都指揮張俊代鐸天順七年卒于鎮贈侯諡襄毅禮有膽畧精騎射善以少擊衆守寧遠三十餘年士卒樂為用邊陲寧謐孫壽嗣爵卒無子弟俊嗣成化末厯鎮甘肅



寧夏弘治中掌南京前府兼督操江出鎮貴州湖廣俊  
少事商販既貴能下士而折衝非所長卒子淇嗣嘗分  
典京營正德中賄劉瑾出鎮兩廣踰年卒弟洵嗣洵雖  
嗣爵先業盡為淇妻所有生母卒無以葬哀憤得疾卒  
無子以再從子棟嗣嘉靖中提督五軍營兼掌中府踰  
十年改總兵湖廣卒贈太子太保諡莊僖傳爵至明亡  
乃絕

毛忠字允誠初名哈喇西陲人曾祖哈喇岱洪武初歸

附起行伍為千戶戰歿祖拜達勒從征哈喇亦戰歿父  
寶以驍勇充總旗為永昌百戶忠襲職時年二十膂力  
絕人善驍射常從太宗北征宣德五年征庫森叛寇有  
功八年征伊伯格勒山禽偽少師知院九年出托歡山  
十年征黑山寇皆禽其酋各進一旨歷用揮同知正統  
三年從都督蔣貴征多爾呼巴勒先登陷陣大獲擢都  
指揮僉事十年以守邊勞進同知始賜姓名年從總兵  
官任禮收捕沙州衛都督訥格部落徙之塞內進都指

揮使十三年率師至罕東生繫訥格弟偽祁王索諾木  
本并其部衆擢都督僉事始賜名尋忠充右叅將協守  
甘肅景泰初侍郎李實使漠北還言忠數遣使通衛拉  
特詔執赴京既至兵部論其罪請將大辟景帝不許請  
貶官發福建立功乃遣之福建而官秩如故令甘肅守  
臣徙其家屬京師初忠之征沙漠也獲番僧什什琳沁  
以獻英宗赦不誅後逃之衛拉特為額森用憾忠欲陷  
之遂宣宗忠與額森交通而朝廷不察也英宗在塞外

獨知之此復辟即召還而忠在福建亦屢有斬馘功乃擢都督同知充左副總兵鎮守甘肅陞見慰諭甚至賜玉帶織金蟒衣天順二年寇大入甘肅巡撫芮鈞劾奏諸將失事罪部議忠功足贖罪置不問三年以鎮番破賊功進左都督五年保刺以數萬騎分掠西寧莊浪甘肅諸道入涼州忠鏖戰一日夜矢盡力疲賊來益衆軍中皆失色忠意氣彌厲拊循將士復殊死鬪賊見終不可勝而援軍亦至遂解去忠竟全師還七年永昌涼州

莊浪塞外諸番屢為邊患忠與總兵官衛穎分討之忠  
先破巴鄂爾諸大族其贊咱瑪吉斯諸族他將不能下  
者忠復擊破之論功忠止增祿百石而穎乃得世券忠  
以為言遂封伏羌伯成化四年固原賊滿四據石城反  
詔忠移師討之與總兵項忠等夾攻賊巢忠由木頭溝  
直抵懋架山下多所斬獲賊稍却冒矢石連雲山北山  
西雨峰而項忠等軍亦克山之東峰及石城東西二門  
賊大窘相對哭忽昏霧起他哨舉烟掣軍賊遂解力攻

忠忠力戰不已為流矢所中卒年七十五從子海孫鏜  
前救忠亦死忠為將嚴紀律善撫士其卒也西陸人弔  
哭者相望于道事聞贈侯諡武勇子世券弘治中從有  
司言建忠義坊于甘州以表其里又從巡撫許進言建  
武勇祠于甘州城東春秋致祭孫銳襲伯爵成化中協  
守南京弘治初出鎮湖廣改兩廣平蠻賊累有功咸璽  
書獎勵之年以廣西破賊增歲祿二百石言官劾銳廣  
置邸舍私造大舶以通番商置不問思恩土官岑濬反與

總督潘蕃討平之既又討平賀縣獍賊加官至太子太  
傅正德三年劉瑾欲殺尚書劉大夏坐以處置田州事  
失宜并逮銳下詔獄獄具革其加官并歲時五百石已  
而賄瑾起督漕運踰年瑾誅被劾罷六年盜劉宸等擾  
畿甸命銳與中官谷大用討之所統京兵皆驕惰不習  
戰明年正月遇賊于長垣與戰大敗身被傷亡將印會  
許泰援軍至僅免言官交劾乃召還以與大用同事以  
不罪世宗即位復起鎮湖廣居三年卒贈太傅諡威襄

傳子江及漢漢嘉靖中掌南京左府提督操江改總督  
漕運未上給事中楊上林劾其所至貪墨褫職逮問卒  
無子從子桓嗣桓卒子登嗣萬厯中掌中軍府垂二十餘  
年又再傳而明亡

和勇初名托克托博囉和寧王阿魯台孫也阿魯台既  
為衛拉特克歡所殺子諤博爾濟延窮蹙款塞來歸宣  
宗授以左都督賜第京師卒勇襲指揮使帶俸錦衣衛  
積功至都督僉事天順元年詔加同知賜姓名久之以



兩廣多寇命充遊擊將軍統降夷千人往討時總兵顏彪無將畧賊勢愈熾廣西巡撫吳禎降之冒功得優賞彪效之亦殺平民報捷朝廷進彪官勇亦進右都督既而師久無功言官劾文武將吏之失事者詔停勇俸充為事官成化初趙輔翰雍太太藤峽賊詔勇以所部從征其冬賊大破進左都督增祿百石三年召督効勇營訓練尋上言大藤峽之役臣與趙輔同功輔還京師賊復于臣親搗賊巢繫其魁誅其黨凡被掠男女四千人

今輔已封伯而臣止進秩惟陛下憐察世宗以勇再著  
戰功特封靖安伯十年卒諡武勇世襲指揮使勇性廉  
謹在兩廣時諸將多營私漁利勇獨無所取時論稱之  
羅秉忠初名科爾羅占占沙州衛都督僉事琨濟楞子  
也兄訥格既襲父職英宗復命秉忠為指揮使協理衛  
事既而訥格率千二百人內徙詔居之東昌平山二衛  
給田廬什器所以撫恤甚厚訥格卒秉忠為都指揮使  
代領其衆英宗北狩塞上多警朝議恐降人乘機為變

欲徙之南方會貴州苗亂都督毛福壽南征即擢秉忠  
都督僉事率所部援勦積戰功至左都督天順初始賜  
姓名曹欽之反番官多從之者秉忠亦坐下獄籍其家  
久之上章自辨乃得釋成化初尚書程信討山都掌蠻  
秉忠以遊擊將軍從既抵永寧分兵六道秉忠由金鷲  
江進大破之論功封順義伯十六年卒謚榮壯子孫世  
指揮使

贊曰明興諸蒙古懷太祖功德多樂內附賜姓名授官

職者不可勝紀繼以成祖銳意遠圖震耀輝威于是英  
允誠金忠之徒率衆來屬遂得列爵授任比肩勲舊或  
以戰功自奮錫券受封傳世不絕視乎陸梁倔強者順  
逆殊異不其昭歟土木以還勢以不競邊政日弛和碩  
語達諸部騷動無寧歲盛衰之故概可攷焉

明史卷一百五十六

欽定四庫全書

吳允誠傳命達蘭更名克忠襲爵

臣劉錫嘏按傳維

鱗明書云子伯克嗣伯賜名克忠史作答蘭彼此小

異謹識闕疑

吳成傳

金順附

金順本名阿爾噶錫哩

臣劉錫嘏按

金順傳維鱗明書作衛拉特人史畧之謹識

金忠傳封忠勇王

臣黃壽齡按金忠封王不言食祿

當屬遺漏後文並支二俸亦無根據矣考傅維鱗明書云歲祿千石謹識

金忠傳帝曰去留任所欲耳

臣劉錫嘏按傅維鱗明

書或言忠去必不返返上曰朕推心待人何疑于忠同此覆載任渠去留竟與兵數千遣去數日俘斬敵人及畜產以歸上大喜曰忠朕之金日磾也推心數語得帝王之度史作朕有天下獨少此二人耶語意相反謹識

毛勝傳封南寧伯

臣劉錫嘏按毛勝之南寧不言食

祿當屬漏遺考傳維鱗明書云食祿千鍾謹識

毛勝傳謚莊毅

臣劉錫嘏按毛勝之謚史作莊毅功

臣世表同傳維鱗明書作忠壯彼此互異考彙典亦云毛勝謚莊毅誤作忠壯謹識

焦禮傳備禦遼東

臣劉錫嘏按李賢所撰焦禮神道

碑云宣德初以遼東密邇諸番命禮往守適與敵遇禮當陣生致賊酋餘皆潰散陞指揮使辛卯邊將以



禮才堪御衆薦陞都指揮僉事壬辰以征哨功進都  
指揮同知威名大振正統辛酉用都督曹儀薦陞都  
指揮使壬戌海西寇邊禮率兵禦之獲士馬甚衆癸  
亥命守寧遠丑丑以邊功進左軍都督仍守寧遠丁  
卯襲敗敵于境外以奇功陞都督同知賚白金綵幣  
較史為詳詳識

焦禮傳景泰四年賊二千餘騎犯興水堡禮擊走之

臣劉錫嘏按李賢所撰焦禮神道碑云景泰甲戌禮

復率兵北討生致渠魁一人獲牛馬尤衆進左都督  
考景泰五年歲在甲戌史于禮進左都督之事云在  
景泰四年且以為擊賊興水堡而傅維鱗明書又云  
景泰元年破敵小團山斬獲數千年分戰地彼此互  
異謹識

焦禮傳封東寧伯

臣劉錫嘏按東寧之封不言食祿

之數當屬遺漏考傅維鱗明書獻徵錄功臣世表俱  
云食祿千二百石謹識

毛忠傳禽偽少師知院

臣劉錫嘏按偽少師原名哲

卜尊巴勒固偽知院原名奇徹岱見獻徵錄謹識

毛忠傳九年出北歡山十年征黑山寇皆擒其酋

臣

劉錫嘏按北歡山擒賊首旺扎勒特穆爾陞本衛指揮僉事黑山擒都爾伯台陞指揮同知俱見獻徵錄

謹識

毛忠傳侍郎李寔使漠北還言忠數遣使通衛拉特詔  
執赴京既至兵部論其罪請置大辟景帝不許

臣

劉錫嘏按獻徵錄云甘之內外守臣及其邊人俱為  
忠訟朝廷亦知其偽置之不問史祇云景帝不許而  
不詳其故謹識

毛忠傳封伏羌伯

臣

劉錫嘏傳按忠封伏羌伯不言

祿之數考獻徵錄傳維鱗明書俱云食祿一千石謹  
識

和勇傳召督効勇營訓練

臣

劉錫嘏按効勇營考典

彙云成化二年十二月復立十二營凡十二萬人曰

奮武耀武練武顯武敢勇果勇効勇鼓勇立威伸威  
揚威振威十二營內各分五軍三千統騎兵神機統  
火器兵志畧同志又云命侯十二人掌之團營之法  
又稍變謹識

和勇傳封靖安伯

臣

劉錫嘏按和勇封靖安伯不言

食祿考傳維鱗明書云食祿千一百石勤識

羅秉忠傳封順義伯

臣

劉錫嘏按秉忠封順義伯不

言食祿考傳維鱗明書云食祿千一百石謹識

欽定四庫全書薈要卷六千七百五十史部

明史卷一百五十七

大學士張廷玉等奉

敕修

列傳第四十五

金純

張本

郭敦

郭璉

鄭辰

柴車

劉中敷

子機

張鳳

周瑄子絃

楊鼎翁世資

黃鎬

胡拱辰

陳俊

林鶚

潘榮

夏時正

金純字德修泗州人洪武中國子監生以吏部尚書杜澤薦授吏部文選司郎中三十一年出為江西布政司右參政成祖即位以蹇義薦召為刑部右侍郎時將營北京命採木湖廣永樂七年從巡北京八年從北征遷

左侍郎九年命與宋禮同治會通河又同徐亨蔣廷瓚  
濬魚王口黃河故道初太祖用兵梁晉間使大將軍徐  
達開塌場口通河於泗又開濟寧西耐牢坡引曹鄆河  
水以通中原之運其後故道寢塞至是純疏治之自開  
封北引水達鄆城入塌場出穀亭北十里為永通廣運  
二閘十四年改禮部左侍郎越二月進尚書十五年從  
巡北京十九年同給事中葛紹祖巡撫四川仁宗即位  
改工部居數月又改刑部明年兼太子賓客宣德三年



純有疾帝命醫視療稍間免其朝參俾護疾視事會暑  
敕法司理滯囚純數從朝貴飲為言官所劾帝怒曰純  
以疾不朝而燕於私可乎命繫錦衣獄既念純老臣釋  
之落太子賓客八月予致仕去純在刑部仁宗嘗論純  
法司近尚羅織言者輒以誹謗得罪甚無謂自今坐誹  
謗者勿論純亦務寬大每誠屬吏不得妄椎擊人故當  
純時獄無瘐死者正統五年卒贈山陽伯

張本字致中東阿人洪武中自國子生授江都知縣燕

兵至楊州御史王彬據城抗為守將所縛本率父老迎降成祖以滁泰二知州房吉田慶成率先歸附命與本並為楊州知府偕見任知府譚友德同蒞府事尋擢本江西布政司右參政永樂四年召為工部左侍郎坐事免官冠帶辦事明年五月復官尋以奏牘書銜誤左為右為給事中所劾帝命改授本部右侍郎而宥其罪七年皇太子監國奏為刑部右侍郎善摘奸命督北河運躬自相視立程度舟行得無滯會疾作太子賜之狐裘

冠鈔遣醫馳視十九年將北征命本及王彰分往兩直隸山東山西河南督有司造車挽運明年即命本督北征餉仁宗即位拜南京兵部尚書兼掌都察院事召見言時政得失且請嚴飭武備帝嘉納之遂留行在兵部宣德初工部侍郎蔡信乞徵軍匠家口隸錦衣衛本言軍匠二萬六千人屬二百四十五衛所為匠者暫役其一丁若盡取以來家以三四丁計之數近十萬軍伍既缺人情驚駭不可帝善本言征漢庶人從調兵食庶人

就禽命撫輯其衆而錄其餘黨還以軍政久敝奸人用  
貨脫籍而援平民實伍言於帝擇廷臣四出釐正之時  
馬大孳息畿內軍民為畜牧所困本請分牧於山東河  
南及大名諸府山東河南養馬自此始晉王濟熿坐不  
軌奪爵本奉命散其護衛軍於邊鎮四年命兼太子賓  
客戶部以官田租減度支不給請減外官俸及生員軍  
士月給帝以軍士艱不聽減餘下廷議本等持不可乃  
止陽武侯薛祿城獨石諸戍成本往計守禦之宜還奏

稱旨命兼掌戶部本慮邊食不足而諸邊比歲稔請出  
絲麻布帛輸邊易穀多者三四十萬石少者亦十萬石  
儲備頓充六年病卒賜賻三萬緡塋祭甚厚本廉介有  
執持尚刻少恕錄高煦黨脅從者多不免成祖宴近臣  
銀器各一案因以賜之獨本案設陶器諭曰卿號窮張  
銀器無所用本頓首謝其為上知如此

郭敦字仲厚堂邑人洪武中以鄉舉入太學授戶部主  
事遷衢州知府多惠政衢俗貧者死不塋輒焚其屍敦

為厲禁且立義阡俗遂革禁民聚淫祠敦疾民勸弛其  
禁弗聽疾亦瘳在衢七年永樂初坐累徵耆老數百人  
伏闕乞留不得後廷臣言敦廉正召補監察御史遷河  
南左參政調陝西十六年春胡濙言敦有大臣體擢禮  
部右侍郎兼太僕寺卿偕給事中陶衍巡撫順天二十  
年督北征餉仁宗即位以大行喪不齋宿降太僕卿旋  
進戶部左侍郎兼詹事府少詹事宣德二年進尚書陝  
西旱命與隆平侯張信整飭庶務當行者同三司官計

議奏行敦乃請蠲逋賦振貧乏考黜貪吏罷不急之務  
凡十數事悉從之歲餘召還在部多所興革罷王田之  
奪民業者令民開荒不起科建漕運議民運至瓜洲儀  
真濟衛卒運至京民甚便之敦事親孝持身廉同官有  
為不義者輒厲色待之其人悔謝乃已性好學公退手  
不釋卷六年卒官年六十二

郭璉字時用初名進新安人永樂初以太學生擢戶部  
主事歷官吏部左右侍郎仁宗即位命兼詹事府少詹

事更名璉宣宗初掌行在詹事府吏部尚書蹇義老輟  
部務帝欲以璉代璉厚重勤敏然寡學術楊士奇言恐  
璉不足當之宜妙擇大臣通經術知今古者帝乃止踰  
年卒為尚書諭以呂蒙正夾袋虞允文材館錄故事璉  
由是留意人才識進士李賢輔相器授吏部主事後果  
為名相時外官九年考滿部民走闕下乞留輒增秩復  
任璉慮有妄者請覆實從之璉雖長六卿然望輕又政  
歸內閣自布政使至知府闕聽京官三品以上薦舉既



又命御史知縣皆聽京官五品以上薦舉要職選擢皆不關吏部正統初左通政陳恭言古者擇任庶官悉由選部職任專而事體一今令朝臣各舉所知恐開私謁之門長奔競之風乞杜絕令歸一下吏部議璉遜謝不敢當事遂寢正統六年御史曹恭以災異請罷大臣不職者帝命科道官參議璉及尚書吳中侍郎李庸等被劾者二十人璉等自陳帝切責而宥之璉子亮受賂為人求官事覺御史孫毓等劾璉乃令璉致仕而以王直

代

鄭辰字文樞浙江西安人永樂四年進士授監察御史  
江西安福民告謀逆事命辰往廉之具得誣狀福建番  
客殺人復命辰往止坐首惡釋其餘南京敕建報恩寺  
役囚萬人蜚語言役夫謗訕恐有變命辰往驗無實無  
一得罪者谷庶人謀不軌復命辰察之盡得其踪跡帝  
語方賓曰是真國家耳目臣矣十六年起遷山西按察  
使糾治貪濁不少貸潞州盜起有司以叛聞詔發兵討

捕辰方以事朝京師奏曰民苦徭役而已請無發兵帝然之還則屏騶從親入山谷撫諭盜皆感泣復為良民禮部侍郎蔚綬轉粟給山海軍辰統山西民輦任民勞多逋耗綬令即山海貨償之辰曰山西民貧而悍急之恐生變不如緩之使自通有無用其言卒無逋者丁內艱歸軍民詣御史乞留御史以聞服闋還舊任宣德三年召為南京工部右侍郎初兩京六部堂官缺帝命廷臣推方面官堪內任者蹇義等薦九人獨辰及邵玘傅

啓讓帝素知其名即真授餘試職而已英宗即位分遣大臣考察天下方面官辰往四川貴州雲南悉奏罷其不職者雲南布政司周璟居妻喪繼娶辰劾其有傷風教璟坐免正統二年奉命振南畿河南饑時河堤決即命辰伺便修塞或議自大名開渠引諸水通衛河利灌輸辰言勞民不便事遂寢遷兵部左侍郎與豐城侯李彬轉餉宣府大同鎮守都督譚廣撓令劾之事以辦八年得風疾告歸明年卒辰為人重義輕財初登進士產

悉讓兄弟在山西與同僚杜僉事有違言杜卒為治喪資遣其妻子

柴車字叔輿錢唐人永樂二年以舉人授兵部武選司主事歷員外郎八年帝北京從尚書方賓扈行還遷江西右參議坐事左遷兵部郎中出知岳州府復入為郎中宣德五年擢兵部侍郎明年山西巡按御史張勗言大同屯田多為豪右占據命車往按得田幾二千頃還之軍英宗初西鄙不靖以車廉幹命協贊甘肅軍務調

軍給餉悉得事宜多爾濟巴勒寇涼州副總兵劉廣喪  
師不以實聞顧飾功要賞車劾奏械廣至京賜車金幣  
旌其直岷州土官后能冒功得陞賞車奏請加罪能復  
請命宥之車反覆論其不可曰詐冒如能者實繁有徒  
臣方次第按覈今宥能何以戢衆若無功得官則捐軀  
死敵者何以待之朝廷雖從能請然嘉車賢遣使勞賜  
之正統三年以破多爾濟巴勒功增俸一級在邊章數  
十上悉中時病同事多不悅車持益堅嘗建言漠北降

人朝廷留之京師雖厚爵賞其心終異如青托克托穆爾者昔隨其長來歸尋叛去今乃復來安知他日不再叛宜徙江南離其黨類事下兵部請處之河間德州帝報可後降者悉以此令從事稽覈屯田豪占者悉清出之得六百餘頃四年進兵部尚書參贊如故尋命兼理陝西屯田明年召還命與僉都御史曹翼歲更代出鎮及期病甚詔遣大理寺少卿程富代翼而命車歸治疾未及行六年六月卒車在江西時以採木入閩經廣信

廣信守故人也餽蜜一罌發視之乃白金笑曰公不知  
故人矣却不受同事邊塞者多以宴樂為豪舉車惡之  
遂斷酒肉其介特多類此

劉中敷大興人初名中孚燕王舉兵以諸生守城功授  
陳留丞擢工部員外郎仁宗監國命署部事賜今名遷  
江西右參議宣德三年遷山東右參政進左布政使質  
直廉靜吏民畏懷歲大侵言於巡撫減賦三之二正統  
改元父憂奪情俄召拜戶部尚書帝冲年踐阼慮羣下



欺已治尚嚴而中官王振假以立威屢撫大臣小過導

帝用重典大臣下吏無虛歲三年諷給事御史劾中數

與左侍郎吳璽等下獄釋還職六年言官劾中數專擅

詔法司於內廷雜治當流許輸贖帝特宥之其冬中數

璽及右侍郎陳璘請以供御牛馬分牧民間言官劾其

變亂成法並下獄論斬詔荷校長安門外凡十六日而

釋衛拉特入貢詔問馬駝芻菽數不能對復與璽論

斬繫獄中數以母病特許歸省明年冬當決囚法司以

請命璽瑞戍邊中數俟母終具奏已釋為民景帝立起

戶部左侍郎兼太子賓客時方用兵論功行賞無虛日

中數言府庫財有限宜撙節以備緩急帝嘉納景泰四

年卒贈尚書中數性淡泊食不重味仕宦五十年家無

餘貲子璉正統十年進士授刑科給事中累官太僕寺

卿恥華靡居官剛果左遷遼東苑馬寺卿卒子機幼有

孝行成化十四年進士改庶吉士正德中代張綏為吏

部尚書以人言乞歸起南京兵部尚書參贊機務流賊

犯江上象議擇將適都督李昂自貴州罷官至機即召  
任之昂以無朝命辭機曰機奉敕有云敕所不載聽便  
宜此即朝命也象服其膽識致仕歸卒

張鳳字子儀安平人父益官給事中永樂八年從征漠  
北歿於陣鳳登宣德二年進士授刑部主事讞江西叛  
獄平反數百人正統三年十二月法司坐事盡繫獄遂  
擢鳳本部右侍郎以主事擢侍郎前時未有也明年命  
提督京倉六年改戶部尋調南京適尚書久闕鳳遂掌

部事貴州奏軍衛乏糧乞運龍江倉及兩淮鹽於鎮遠府易米鳳以龍江鹽雜泥沙不堪易米給軍盡以淮鹽予之然後以聞帝嘉賞又言留都重地宜歲儲二百萬石為根本計從之遂為令南京糧儲舊督以都御史十二年冬命鳳兼理廉謹善執法號板張景泰二年進尚書四年改兵部參贊軍務戶部尚書金濂卒召鳳代之時四方兵息而災傷特甚帝屢詔寬恤鳳偕廷臣議上十事明年復先後議上八事咸報可鳳以災傷蠲賦多

國用益絀乃奏言國初天下田八百四十九萬餘頃今數既減半加以水旱停征國用何以取給京畿及河南山東無額田甲方墾闢乙即訐其漏賦請準輕則征租不惟求絕爭端亦且少助軍國報可給事中成章等劾鳳擅更祖制楊穰等復爭之帝曰國初都江南轉輸易今居極北可守常制耶四方報凶荒者鳳請令御史勘實議者非之英宗復辟調南京戶部仍兼督糧儲五年二月卒鳳有孝行性淳樸故人死聘其女為子婦教其

子而養其母終身同學友蘇洪好面斥鳳過及為鳳屬官猶然鳳待之如初聞其貧即賙給之

周瑄字廷玉陽曲人由鄉舉入國學正統中除刑部主事善治獄十三年遷員外郎明年帝北征郎中當扈從者多託疾瑄請行六師覆沒瑄被創歸擢署郎中校尉受賕縱盜以讐人代瑄辨雪之抵校尉罪外郡送囚一日至八百人瑄慮其觸熱三日決遣之殆盡景泰元年以尚書王直薦超拜刑部右侍郎久之出振順天河間

饑未竣而英宗復位有司請召還不聽復賜敕令便宜處置瑄遍歷所部大舉荒政先後振饑民二十六萬五千給牛種各萬餘奏行利民八事事竣還明年轉左帝方任門達達杲數興大獄瑄委曲開諭多所救正復飭諸郎毋避禍以故移部定罪者不至冤濫官刑部久屬吏不敢欺意主寬恕不為深文同佐部者安化孔文英為御史時按黃巖妖言獄當坐者三千人皆白其誣獨械首從一人論罪及是居部與瑄並稱長者七年命瑄

署掌工部事瑄恬靜淡榮利成化改元為侍郎十六年  
矣始遷右都御史督理南京糧儲捕懲作奸者數輩宿  
弊為清鳳陽淮徐饑以瑄言發廩四十萬以振久之遷  
南京刑部尚書令諸司事不須勘者毋出五日獄無滯  
囚暑疫悉遣輕繫者曰召汝則至囚歡呼去無失期者  
為尚書九載屢疏乞休久之乃得請家無田園卜居南  
京卒贈太子少保謚莊懿長子經尚書自有傳次子紘  
進士為南京吏科給事中兩以災異言事帝竝嘉納未



幾與御史張曷閱軍為中官蔣琮誣奏貶南京光祿署丞仕終山東參議

楊鼎字宗器陝西咸寧人家貧力學舉鄉會試第一正統四年殿試第二授編修久之與侍講杜寧等十人簡入東閣肄業鼎居侍從雅欲以功名見嘗建言修飭戎備通漕三邊二事同輩誚其迂鼎益自信額森將寇京師詔行監察御史事募兵兗州景泰三年進侍講兼中允五年超擢戶部右侍郎天順初轉左陳汝言譖之帝

不聽三年冬以陪祀陵寢不謹下獄贖杖還職帝嘗命  
中官牛玉諭旨欲取江南折糧銀實內帑而以他稅物  
充武臣俸鼎不可馬牛芻乏議徵什二又以民艱力沮  
皆報罷七年尚書年富有疾詔鼎掌部事成化四年代  
馬昂為戶部尚書而以翁世資為侍郎六年鼎疏言陝  
西外患西寇內患流民然寇害止邊塞流民則疾在腹  
心漢中僻居萬山襟喉川蜀四方流民數萬急之生變  
置之有後憂請暫設監司一人專領其事其願附籍者

聽之不願者資遣兼與守臣練士馬修城池庶可弭他  
日患詔從之湖廣頻歲饑發廩已盡及是有秋用鼎言  
發庫貯銀布易米備災淮徐臨德四倉舊積糧百餘萬  
石後餉乏民饑輒請移用粟且置鼎議上贖罪中鹽折  
鈔徵逋六事行之由是諸倉有儲蓄尋加太子少保鼎  
居戶部持廉然性頗拘滯十五年秋給事御史劾鼎非  
經國才鼎再疏求去賜敕馳驛歸命有司月給米二石  
歲給役四人終其身大臣致仕有給賜自鼎始也卒贈

太子太保謚莊敏子時暘進士累官侍講學士多識典故有用世才時數舉人廬墓被旌官兵部司務翁世資者莆田人正統七年進士除戶部主事歷郎中天順元年拜工部右侍郎四年命中官往蘇松杭嘉湖增織彩幣七千匹世資以東南水潦民艱食議減其半尚書趙榮左侍郎霍瑄難之世資請身任其咎乃連署以諫帝果怒詰主議者榮等委之世資遂下詔獄謫衡州知府成化初擢江西左布政使坐事下吏尋得白大軍征兩

廣轉江西餉需十萬人世資議齎直就易嶺南米民得不擾以右副都御史巡撫山東歲饑發倉儲五十餘萬石以振撫流亡百二十二萬人召為戶部右侍郎佐鼎久之代薛遠總督倉場進尚書十七年還理部事閱二年致仕

黃鎬字叔高侯官人正統十二年以進士試事都察院未半歲以明習法律授御史十四年按貴州羣苗盡叛道梗塞靖遠伯王驥等自麓川還軍無紀律苗襲其後

官軍大敗鎬赴平越遇賊幾死夜跳入城賊圍之議者  
欲棄城走鎬曰平越貴州咽喉無平越是無貴州也乃  
偕諸將固守置密疏竹筒中募土人間行乞援於朝且  
劾驥等覆師狀景帝命保定伯梁瑤等合川湖軍救之  
圍始解城被困已九月掘草根煮弩鎧而食之死者相  
枕籍城卒全鎬功為多復留按一年久之遷廣東僉事  
改浙江成化初以大臣會薦擢廣東左參政高雷廉負  
海多盜鎬討平之再遷廣西左布政使以右副都御史

總督南京糧儲歷吏部左右侍郎十六年拜南京戶部  
尚書鎬有才識敏吏事理鹽政多所釐剔時論稱之十  
九年致仕道卒贈太子少保謚襄敏

胡拱辰字共之淳安人正統四年進士為縣縣知縣有  
惠政擢御史疏陳時弊八事父艱歸景帝即位詔科道  
官憂居者悉起復拱辰至屢疏以選將保邦修德弭災  
為言出為貴州左參政白水堡犴狴頭目沈時保素梗  
化拱辰言於都督官方瑛遣將往禽之一方遂寧至畢

節平宣慰使隴富亂威行邊徼母憂去御史追劾其受  
賕事下浙江按臣執訊事白調廣東歷廣西四川左右  
布政使皆有平寇功成化八年拜南京右副都御史提  
督操江十一年就遷兵部右侍郎儲位虛久與尚書崔  
恭等請冊立言甚切其年復就改左副都御史總理糧  
儲就進工部尚書節財省事人皆便之以年至乞歸宏  
治中巡按御史陳銓言拱辰退休十餘年生平清操如  
一日乞加禮異以勵臣節詔有司月給廩二石歲隸四



人正德元年年九十遣行人齎敕存問賚羊酒加賜廩  
隸三年正月卒贈太子少傅謚莊懿

陳俊字時英莆田人舉鄉試第一正統十三年進士除  
戶部主事督天津諸衛軍採草奏減新增額三十五萬  
東豪猾侵蘇松改折銀七十餘萬兩俊往督不數月畢  
輸尚書金濂以為能俾典諸曹章奏歷郎中天順五年  
兩廣用兵俊督餉時州縣殘破帑藏殫虛弛鹽商越境  
令引加米二斗軍興賴以無乏母喪不聽歸蠻平始還

初俊為主事奔父喪賻者皆却之至是文武將吏醵金賻亦不納成化初擢南京太常少卿四年召拜戶部右侍郎俊練習錢穀四方災傷邊鎮急芻餉奏請還至裁決咸當尚書楊鼎深倚之京師大饑先後發太倉粟八十萬石平糶石值六錢豪猾乘時射利俊請糴以升斗為率過一石勿與饑民獲濟尋議用兵河套敕俊赴河南山陝會巡撫諸臣畫芻餉發帑金二十萬助之俊以邊庾空竭歲又不登而榆林道險遠轉輸難乃發金於

內地市場修西安韓城同官徑道以利飛輓還朝進俸  
一級歷吏部左右侍郎九載滿拜南京戶部尚書尋改  
兵部參贊機務先是參贊之任不專屬兵部自薛遠後  
繼以俊遂為定制久之就改吏部二十一年星變率九  
卿陳時弊二十事皆極痛切帝多采納而權倖所不便  
者終格不行明年乞致仕詔加太子少保賜敕馳傳還  
卒謚康懿

林鶚字一鶚浙江太平人景泰二年進士授御史監京

畿鄉試陳循等訐考官鶚邑子林挺預薦疑鶚有私逮  
挺考訊挺實無他得白英宗復辟倣先朝故事出廷臣  
為知府鶚得鎮江召見賜膳及道里費諭所以擢用意  
鶚感激革弊舉廢治甚有聲漕故經孟瀆險甚巡推崔  
恭議鑿河自七里港引金山上流通丹陽避之鶚言道  
里遠多石且壞民廬墓請按京口閘甘露壩故迹濬之  
令通舟春夏啓閘秋冬度壩功力省便恭從其議遂為  
永利居五年以才任治劇調蘇州成化初超遷江西按

察使有犯大辟賄達官求生者鶚執愈堅廣東寇剽贛  
州急調兵禦之遁去廣信妖賊妄稱天神惑衆捕戮其  
魁立解散歷左右布政使歲饑奏減民租十五萬石成  
化六年擢南京刑部右侍郎母憂服除召為刑部右侍  
郎執法不撓十二年得疾卒鶚事母孝謹對妻子無惰  
容不妄交與公餘輒危坐讀書歿不能具棺斂友人為  
經紀其喪鶚在蘇州先聖像剝落鶚曰塑像非古也昔  
太祖於國學用本主命改從之嘉靖中御史趙大佑上

其節行贈刑部尚書謚恭肅

潘榮字尊用龍溪人正統十三年進士景泰初犒師廣東還除吏科給事中景泰初疏論停起復抑奔競數事帝納之尋進右給事中四年九月上言致治之要莫切於納諫比以言者忤聖意諭禮部凡遇建言務加審察或假以報復具奏罪之此令一下廷臣喪氣以言為諱國家有利害生民有得失大臣有奸慝何由而知況今巨寇陸梁塞上多事奈何反塞言者路望明詔臺諫知

無不言緘默者罪竝赦閣部大臣勿搜求參駁虧傷治  
治體疏入報聞天順六年使琉球還遷都給事中成化  
六年三月偕同官上言近雨雪愆期災異迭見陛下降  
詔自責躬行祈禱詔大臣盡言宜上天感格而今乃風  
霾晝晦沴氣赤而復黑豈非應天之道有未盡與夫人  
君敬天不在齋戒祈禱而已政令乖宜下民失所崇尚  
珍玩費用不經後宮無序恩澤不均爵濫施於賤工賞  
妄及於非分皆非敬天之道願陛下日御便殿召大臣

極陳缺失而釐革之庶災變可弭時萬妃專寵羣小夤緣進寶玩官賞冗濫故榮等懇言之帝不能用是年遷南京太常少卿又七年就擢戶部右侍郎尋改右副都御史總督南京糧儲積奇羨數萬石以備荒十七年召為戶部左侍郎尋署部事英國公張懋等四十三人自陳先世以大功錫爵子孫承繼所司輒減歲祿非祖宗報功意榮等言懋等於無事時妄請增祿若有功何以勸賞况頻年水旱國用未充所請不可許事乃寢中官



趙陽等乞兩淮鹽十萬引帝已許之榮等言近禁勢家中鹽詔旨甫頒而陽等輒違犯宜正其罪帝為切責陽等南京戶部尚書黃鎬罷以榮代之孝宗嗣位謝政歸賜月廩歲夫如制九年卒年七十有八贈太子太保

夏時正字季爵仁和人正統十年進士除刑部主事景泰六年以郎中錄囚福建出死罪六十餘人中有減死詔充所在濱海衛軍者時正慮其入海島為變轉發之山東然後以聞因言凡福建減死囚俱宜戍之北方法

司是其言而請治違詔罪帝特宥之時正又言通番及劫盜諸獄以待會讞淹引時月囚多瘐死請令所司斷決詔從之且推行之天下天順初擢大理寺丞久之以便養遷南京大理少卿成化五年遷本寺卿明年春命巡視江西災傷除無名稅十餘萬石汰諸司冗役數萬奏罷不職吏二百餘人增築南昌濱江堤及豐城諸縣陂畝民賴其利嘗上奏不具齎奏人姓名吏科論其簡恣帝宥其罪錄彈章示之遂乞休歸僦居民舍布政使

張瓚為築西湖書院居之家食三十年年近九十而卒  
時正雅好學閒居久多所著述於稽古禮文事尤詳  
贊曰金純等黽勉奉公當官稱職加之提躬清白操行  
無虧固列卿之良也鄭辰之廉事周瑄之治獄皆有仁  
人之用心君子哉

明史卷一百五十七

欽定四庫全書

明史卷一百五十七考證

金純傳九年命與宋禮同治會通河又同徐亨蔣廷瓚  
濬魚王口黃河故道

臣黃壽齡按是年與純同治

會通河者尚有都督周長見明寔錄謹附考

鄭辰傳正統二年奉命振南畿河南饑時河堤決即命

辰伺便修塞

臣黃壽齡按鄭辰之命振饑在正統

二年六月見明英宗本紀傳作元年誤謹附考

楊鼎傳鼎上疏言陝西外患西寇內患流民

臣黃壽

齡按是時為陝西邊患者阿勒台多爾濟巴勒而已  
無所謂四寇考獻徵錄作西寇於當日時事較合蓋  
西與四字形相同故訛耳謹據改

胡拱辰傳白水堡犴狔頭目沈時保素梗化拱辰言於  
都督官方瑛遣將往禽之

臣黃壽齡按方瑛擒叛

苗在景泰三年十一月見明本紀但是時瑛為都督  
至七年十一月討湖廣叛苗始加平蠻將軍充總兵


官傳誤謹改

潘榮傳景泰初犒師廣東還除吏科給事中

臣黃壽

齡按明本紀廣東黃蕭養之亂在正統十三年八月  
維時天順已為衛拉特所獲至景泰元年五月都督  
同知董興始擊滅之榮之犒師當在是時則非正統  
間事矣廣東景泰初三字應移廣東句上叙事方合  
謹改





總校官編修臣吳紹濬



佛陀教育基金會 釋淨空 敬贈